

ELKI 2014

Üses Turnerjahr heimer mit 24 Ching u Begleitperson dörfe gmeinsam starte. Mir hei üses Land chlie gnauer agluegt u kenneglehrt u nach jedere Turnstung hets füre Reisepass äs Bieudli zum Inechläbe gä. Damit d Mamis o einisch dGlägeheit hei, sech in Rueh usztusche, heimer o dieses Jahr ds zNachtässe im Vorstedtli in Aegerte organisiert u hei ganz ä gmüetleche Obe zäme verbracht. Ds VAKI-Turne im März ungerem Thema Vergnügigspark hei 19 Ching mit Mamí oder Papi bsuecht. Für die einte Ching isches bereits ds letschte VAKI-Turne gsi u für üsi jüngere Ching ds erste gmeinsame Turne mitem Papi. Bim gmüetleche Apéro sí de dMamis u dGschwüsterti derzue gstosse. Bereits ändi März heimer üses ELKI-Jahr 2013/2014 ire schöne Osterstung verbunde mit Osternästli mache und aus Abschluss ä Ostergschicht lose beändet. Bimene gmüetleche zMorgeässe heimer ds Jahr nomau revue passiert u dCorinne und ig sí mitemne sehr härzige Osterchorb vo de Mamis u Ching verdankt worde.

I dr Summerpouse hei sech dCorinne und ig Gedanke fürs neue Jahr gmacht u so símer de im Ougust mit 20 Ching u Begleitig zum Thema Alphabet gstartet. dChing hei äs Turnerseckli bercho, wo sie nach jedere Turnstung dr glernt Buechstabe dörfe mit Hieuf vom Mamí oder Papi drufschriebe.

Im Septämber heimer mitere chliene Gruppe vo 7 Ching u ihrne Papis üses VAKI-Turne zum Thema Pirate düregführt. Natürlech heimer dr Schatz ufere einsame Insle gsuecht u zum Schluss glücklecherwies o gfunge. Jedes Ching het síní mitbrachtí Schatztruhe befüllt dörfe entgägenä. Ds gmüetleche Apéro heimer bi wunderbarem Summerwätter Dusse dörfe gniesse.

Nach de Herbstferie sí no spar Ching derzue gstosse u de hets scho glie einisch gheisse gha, mir lehre ds Check-in am Flughafe in Züri für üses Soirée. Mitem Lied „Happy“ símer de vom Flughafe í Flüger igstiege u Richtig Brasilie abgfloge.

Üsi Wiehnachtsstung isch ganz im Zeiche vo Stärne u Stärnehimmu
gstange. Aus Gschänkli hei dChing ä Glitterstab mit Liechtfunktion
bercho – dOuge hei nur einisch gstrahlet – eifach ä herrleche Momänt
gsi!

Mittlerwiele turne 24 Ching mit Begleitig bi üs u bis zum Abschluss Ändi
März heimer no äs wieters VAKI-Turne ufem Programm.

Mir bereitet ds Leite immerno ä sehr grossi Freud, vorauem bi dr
Entwicklig u de Fortschritte vo de Ching dörfe zuezluege u sie dörfe
zungerstütze.

Äs grosses MERCI ad dCorinne und üsi super gueti Zämearbeit. Freue mi
uf die kommendi Leiterziet. MERCI vieumau üsem Verein für die
grosszügigi finanzielli Ungerstützig u natürlech mire Familie, wo mir dZiet
güt im Verein chönne mitzwürke!

Wünsche euch u eurer Familie vo Härze aues Liebe im 2015 u gueti
Gsundheit! Üsem Verein o für dieses Jahr vieu Erfoug u unvergässlechi
Momänte i jedere Riege!

Liebi Grüess

Bianca Burckhardt